

Heilbron Fynproewers kuier saam

Interessante kos en wynkombinasies

Op Vrydag, 17 Mei 2019 het die Heilbron Fynproewers weer bymekaar gekom in die Klipkerkie vir hul tweede byeenkoms van die jaar. Die tema was "Wine Paring". Die aand is geopen deur die Voorsitter, mnr Jeff Roos, en mnr Tommie Esterhuyse het almal welkom geheet en genoem dat daar min plekke in vandag se tyd is waar mense uit verskillende oorde net lekker kan rustig raak en saamkuier rondom 'n heerlike bord kos. Daar is ook 'n heildronk gedrink op Heilbron en sy mense.

Vier nuwe lede is ook ingehuldig by die Heilbron Fynproewers en elk het 'n proegeskenkie van mnr Alwyn en Izerka Swart ontvang. Mev Joanne-marie Hattingh van Francolin Creek het die aand se onderwerp aangebied, rakende kombinasies van wyn en kos. Heerlike "frech onion soup" met Parmesan kaas vir voorgereg is saam met twee witwyne bedien nl. 'n Sauvignon Blanc en 'n Chenin Blanc. Die hoofgereg het bestaan uit 'n ryk Beesstert-gereg wat saam met twee rooiwyne nl. Cabernet Sauvignon Malbec en Pinotage bedien is en daarmee saam is wortels gesorteer in gemmer en groenbone met neutgeur bedien. Laastens was dit die nagereg wat bestaan het uit Crème Brulee, Pavlova met aarbeie en dadelstafies. Almal se smaakpapille was behoorlik getoets aan al die interessante kos- en wynkombinasies.



Op die foto verskyn die persone wat ingehuldig is saam met van die Gildemeesters. Riaan en Marlene Agenbag, Alwyn en Izerka Swart (inhuldiging) Willie en Christien Cronje en Jeff Roos (Voorsitter).



Mev. Joanne-marie Hattingh van Francolin Creek wat die aand aangebied het.

Indien u enige nuus vir die koerant het, skakel of stuur e-pos vir Jolandri by 079 846 1075 of 058 852 3033 E-pos: herald-nuus@heilbron.co.za



Tommie en Miemie Esterhuyse geniet 'n glasie wyn.

Skenk bloed en gee 'n moeder 'n toekoms!

Kom skenk bloed by NG Suid Kerksaal, Heilbron en red lewens

Moeders word hierdie maand gevier en almal is bewus van die belangrike rol wat hierdie spesiale mense in ons lewens speel. Moeders is van die mees algemene gebruikers van bloed weens komplikasies tydens geboorte. Maak seker dat daar genoeg bloed vir ons moeders.

Elke jaar, sterf meer as 500 000 vroue onnodig tydens swangerskap of bevalling. Ernstige bloeding sonder toesig kan selfs 'n gesonde vrou binne twee ure laat sterf en dra by tot die dood van tot soveel as 44% van moeders in Afrika. Tot en met 25% van alle moedersterftes kan voorkom word deur toegang tot veilige bloed.

Bykans 26% van bloed in Suid-Afrika word jaarliks gebruik vir vroue wat 'n bloedoortapping benodig tydens bevalling of vir ginekologiese gevalle. Die Suid-Afrikaanse Nasionale Bloeddiens (SANBS) eer alle vroue-skenkers wat gereeld bloed skenk om die

lewens te red van mense wat hulle nie ken nie.

SANBS nooi die gemeenskap van Heilbron om bloed te skenk op Dinsdag 28 Mei 2019 by die NG Suid Kerksaal, Heilbron vanaf 13:00 - 18:30. Die doelwit vir die dag is om 80 eenhede bloed en meer in te samel.

Om 'n bloedskenker te word moet jy:

- Tussen die ouderdom van 16-65 wees
- Meer as 50kg weeg
- Iets voor jou skenking eet
- 'n Veilige seksuele leefstyl lei
- Gesond wees op die dag van skenking

Alle bloedgroepe is baie belangrik vir ons, maar ons het spesifiek Groep O nodig omdat hierdie bloedgroep verenigbaar is met al die ander bloedgroepe en is dus baie spesiaal vir ons en diegene wat 'n dringende behoefte aan bloed het. - SANBS Bloedbank

KOM EEN, KOM ALMAL NA DIE BASAAR VAN DIE AP KERK HEILBRON
Tweedestraat • Vegkop Uitbreiding • Heilbron

AKTIWITEITE: Kettieskiet en skyfskiet.

- MaaMeis @ R60 per kg
- Wors @ R65 per kg
- Biltong @ R180 per kg
- Steak, T-Bene ook beskikbaar

SATERDAG 1 JUNIE OM 10:00

Ribburgers, Sosaties, Pannekoek, vis, kerrie & rys, en vele meer...

Vir meer inligting kontak Stoffel by 071 677 2602



Briewe aan:

Redakteur

Die volgende skrywe is ontvang van Heléne Howell van Huis Bron-van-Heilgerig aan die redakteur.

Opwekking van 'n weduwee se seun by Nain Luk. 7: 11 en 12.

Die toneel gryp Jesus aan. Hy vertrou die vrou: "Moenie huil nie" weerklink Sy simpatieke uitreik na haar. Hoe wonderlik, wanneer iemand in tye van nood 'n hand om die skouer plaas, en uitreik na iemand. Jesus praat nie net nie, maar Hy help. Dis so belangrik dat ons in ons betrokkenheid by ander se nood, nie net praat nie, maar ook iets van ons self gee. Natuurlik kan ons nie siektes genees, of dooies uit die graf laat opstaan nie - dit is Jesus se voorreg om dit te doen. Ons kan egter by die seer mensies gaan kuier, blomme uit ons tuin vir hulle vat, onthou om hulle op spesiaal moeilike dae te skakel en

by hulle gaan sit, indien hulle alleen by 'n funksie opdaag. Ons is nie soos Jesus nie, maar ons kan wel iets van sy Liefde weer-speël. Daar is baie eensames. Gebed! 'Here, gee vir my 'n oop hart, en hand, vir mense met seer. 1 Tess 5:14. Dr Johan Pienaar (Predikant).

Ingestuur deur Heléne Howell

Sommer so terloops 'n grappie uit Lewende Lote. Dis mos goed om 'n bietjie te lag ook: Gatiep en Meraai het die aand so bietjie opgesit in die voorhuis, toe Gatiep begin lirie raak: "Meraai", begin hy, "djou oë is soos druivekorrels, jou neus soos 'n klein piesankie, djou lippies is so mooi soos 'n kersie, djou wangetjies lyk soos 'n peach". Toe sê Maraai: "Gatiep hei man, het dji kom vry, of wil dji fruit salad maak?" Geneem uit: "Lewende Lote 2011"